

## PRIJEDLOG

Na osnovu člana 5. i 29. Zakona o Vladi Tuzlanskog kantona („Službene novine Tuzlanskog kantona“, br. 17/00, 1/05, 11/06, 13/11 i 15/17) i člana 137. stav 6. tačka 2) Zakona o zaštiti od požara i vatrogastvu („Službene novine Federacije Bosne i Hercegovine“, broj 64/09), Vlada Tuzlanskog kantona, na sjednici održanoj dana \_\_\_\_\_ d o n o s i

### ODLUKU

O KORIŠTENJU FINANSIJSKIH SREDSTAVA OSTVARENIH PO OSNOVU NAKNADE IZ PREMIJE OSIGURANJA IMOVINE OD POŽARA I PRIRODNIH SILA I SREDSTAVA OD NAPLAĆENE FUNKCIONALNE PREMIJE OSIGURANJA, KOJA SE ODNOSI NA OSIGURANJE MOTORNIH VOZILA

#### I - OSNOVNE ODREDBE

##### Član 1. (Predmet)

Ovom odlukom utvrđuju se, uslovi, kriteriji i postupak korištenja finansijskih sredstava ostvarenih po osnovu naknade iz premije osiguranja imovine od požara i prirodnih sila i sredstava od naplaćene funkcionalne premije osiguranja, koja se odnosi na osiguranje motornih vozila, koja pripadaju Tuzlanskom kantonu (u daljem tekstu: sredstva za zaštitu od požara i vatrogastvo).

##### Član 2. (Vođenje sredstava)

- (1) Sredstva za zaštitu od požara i vatrogastvo se prikupljaju u skladu sa članom 137. Zakona o zaštiti od požara i vatrogastvu („Službene novine Federacije Bosne i Hercegovine“, broj 64/09, u daljem tekstu: Zakon) i vode se na posebnom transakcijskom računu otvorenom kao podračun u okviru jedinstvenog računa Tuzlanskog kantona (u daljem tekstu: Kanton), na budžetskoj poziciji 26010001.
- (2) Sredstva iz stava (1) ovog člana koja nisu potrošena u tekućoj godini ne gase se istekom kalendarske (fiskalne) godine već se akumuliraju sa sredstvima koja se prikupljaju u toku naredne godine i njima se raspolaže u skladu sa ovom odlukom.

#### II – NAMJENA SREDSTAVA I VISINA POMOĆI

##### Član 3. (Namjena sredstava)

- (1) Sredstva za zaštitu od požara i vatrogastvo koja pripadaju Kantonu mogu se koristiti samo za:
  - a) nabavku vatrogasne opreme, tehničkih i drugih sredstava;
  - b) održavanje opreme i vatrogasnih sredstava;
  - c) investicionu izgradnju i opremanje objekata za potrebe vatrogasnih jedinica i
  - d) stručno obučavanje i osposobljavanje vatrogasaca.

#### Član 4.

##### (Planiranje sredstava i utvrđivanje prioriteta)

- (1) Sredstva za zaštitu od požara i vatrogastvo moraju biti sastavni dio planske projekcije budžeta Kantona, na osnovu kojeg Kantonalna uprava civilne zaštite (u daljem tekstu: Kantonalna uprava) donosi Godišnji plan korištenja sredstava za zaštitu od požara i vatrogastvo (u daljem tekstu: Godišnji plan), na koji Vlada Tuzlanskog kantona daje saglasnost.
- (2) Godišnji plan obavezno sadrži pregled vatrogasne opreme koja će se nabavljati za profesionalne vatrogasne jedinice, aktivnosti koje se odnose na stručno obučavanje i osposobljavanje vatrogasaca, planirane aktivnosti na održavanju vatrogasne opreme, aktivnosti koje se odnose na izgradnju i opremanje objekata te visinu sredstava koja se može koristiti za svaku od ovih namjena.
- (3) U Godišnjem planu se obavezno utvrđuju i prioriteta korištenja sredstava, u zavisnosti od raspoloživih sredstava i potreba.
- (4) Kantonalna uprava dostavlja Godišnji plan Ministarstvu finansija Tuzlanskog kantona.

#### Član 5.

##### (Nabavka vatrogasne opreme i visina sredstava)

- (1) Pod nabavkom vatrogasne opreme, tehničkih i drugih sredstava za vatrogasne jedinice, podrazumijeva se opremanje profesionalne vatrogasne jedinice Kantona i sufinansiranje opremanja gradskih/općinskih profesionalnih vatrogasnih jedinica neophodnom opremom i sredstvima, koji su posebnim propisima ili projektima od zajedničkog interesa utvrđena kao obveza ili minimum neophodan za izvršavanje definiranih zadataka.
- (2) Za namjene iz stava (1) ovog člana može se izdvojiti maksimalno 40% ukupno prikupljenih i raspoloživih finansijskih sredstava.

#### Član 6.

##### (Održavanje opreme i vatrogasnih sredstava)

- (1) Pod održavanjem opreme i vatrogasnih sredstava podrazumijeva se neophodno održavanje opreme i vatrogasnih sredstava u profesionalnim vatrogasnim jedinicama, kako bi se ista mogla koristiti na pravilan i propisan način.
- (2) Za namjene iz stava (1) ovog člana može se izdvojiti maksimalno 10 % ukupno prikupljenih i raspoloživih finansijskih sredstava

#### Član 7.

##### (Investiciona izgradnja i opremanje objekata)

- (1) Pod investicionom izgradnjom i opremanjem objekata za potrebe vatrogasnih jedinica podrazumijeva se izgradnja i opremanje objekata koji su u neposrednoj vezi i funkciji smještaja, rada i funkcioniranja vatrogasnih jedinica u gradovima i općinama (sufinanciranje) ili kantonalne vatrogasne jedinice.
- (2) Za namjene iz stava (1) ovog člana može se izdvojiti maksimalno 30 % ukupno prikupljenih i raspoloživih finansijskih sredstava.

## Član 8.

(Stručno obučavanje i osposobljavanje vatrogasaca)

- (1) Pod stručnim obučavanjem i osposobljavanjem vatrogasaca smatraju se aktivnosti koje su planirane u tekućoj budžetskoj godini, a odnose se na obučavanje i uvježbavanje te polaganja stručnih ispita za pripadnike dobrovoljnih vatrogasnih jedinica dobrovoljnih vatrogasnih društava koje djeluju na području Kantona, odnosno gradova i općina na području Kantona.
- (2) Za namjene iz stava (1) ovog člana može se izdvojiti maksimalno 20% ukupno prikupljenih i raspoloživih finansijskih sredstava.

## Član 9.

(Preraspodjela sredstava)

U cilju jačanja sistema zaštite od požara i vatrogastva, a ako za to postoje opravdani razlozi, može se vršiti međusobna preraspodjela procenata utvrđenih u članovima 5., 6., 7. i 8. ove Odluke, na način da se povećaju sredstva za namjene koje su u tekućoj godini prioritet, a da se istovremeno smanje sredstva na drugim pozicijama.

### III USLOVI I KRITERIJI ZA DODJELU SREDSTAVA ZA ZAŠTITU OD POŽARA I VATROGASTVO GRADOVIMA I OPĆINAMA

## Član 10.

(Uslovi za dodjelu pomoći)

- (1) Sredstva za zaštitu od požara i vatrogastva mogu se dodjeljivati gradovima i općinama na području Kantona kao pomoć u sufinansiranju za namjene iz člana 3. tačke a), b) i c) ove Odluke pod sljedećim uslovima:
  - a) da je formirana profesionalna vatrogasna jedinica na nivou grada/općine ili zajednička jedinica u sporazumu s susjednom općinom ili pravnom osobom (dokaz: izvod iz pravilnika o unutrašnjoj organizaciji, akt o formiranju jedinice ili sporazum o zajedničkoj jedinici);
  - b) da je donesena Procjena ugroženosti grada/općine od požara (dokaz: akt o usvajanju važeće procjene);
  - c) da je donesen Plan zaštite od požara grada/općine (dokaz: akt o usvajanju važećeg plana);
  - d) da se sredstva za zaštitu od požara i vatrogastvo koja pripadaju gradu/općini vode na namjenskom transakcijskom računu (dokaz: ugovor o otvaranju i vođenju računa, potvrda banke kod koje je račun otvoren i slično) i
  - e) da procent sufinansiranja konkretnog projekat/aktivnosti od strane grada/općine iznosi minimalno 50 % ukupne vrijednosti projekta/aktivnosti.
- (2) Za svaki od uslova iz stava (1) ovog člana, podnosilac prijave za dodjelu pomoći dužan je priložiti odgovarajući dokaz.

## Član 11.

(Kriteriji za sufinanciranje nabavke vatrogasne opreme, tehničkih i drugih sredstava)

- (1) U postupku dodjele sredstava gradovima i općinama koji ispunjavaju uslove iz člana 10. ove Odluke za sufinansiranje nabavke vatrogasne opreme, tehničkih i drugih sredstava primjenjivaće se sljedeći kriteriji:

- a) Vrijednost vatrogasne opreme, tehničkih i drugih sredstava
- planirana vrijednost vatrogasne opreme, tehničkih i drugih sredstava manja od 5.000,00 KM ..... 1 bod,
  - planirana vrijednost vrijednost vatrogasne opreme, tehničkih i drugih sredstava od 5.000,00 do 10.000,00 KM ..... 3 boda,
  - planirana vrijednost vrijednost vatrogasne opreme, tehničkih i drugih sredstava od 10.000,00 do 20.000,00 KM ..... 5 bodova,
  - planirana vrijednost vrijednost vatrogasne opreme, tehničkih i drugih sredstava od 20.000,00 do 30.000,00 KM ..... 7 bodova,
  - planirana vrijednost vrijednost vatrogasne opreme, tehničkih i drugih sredstava preko 30.000,00 KM ..... 10 bodova.
- b) Utrošena sredstva u budžetu grada/općine za nabavku vatrogasne opreme, tehničkih i drugih sredstava u prethodnoj godini (bez sredstva za zaštitu od požara i vatrogastvo iz člana 137. Zakona)
- veća od 20.000,00 KM ..... 10 bodova
  - od 10.000,00 KM do 20.0000,00 KM ..... 7 bodova
  - do 10.0000,00 KM ..... 4 boda
  - nisu utrošena sredstva u budžetu grada/općine ..... 0 bodova

#### Član 12.

(Kriteriji za sufinanciranje održavanja opreme i vatrogasnih sredstava)

- (1) Prilikom raspodjele sredstava za sufinanciranje održavanja opreme i vatrogasnih sredstava koristiće se sljedeći kriteriji:
- (a) Vrijednost održavanja opreme i vatrogasnih sredstava
- planirana sredstva za održavanje opreme i vatrogasnih sredstava do 1.000,00 KM ..... 1 bod,
  - planirana sredstva za održavanje opreme i vatrogasnih sredstava od 1.000 KM do 3.000,00 KM ..... 2 boda,
  - planirana sredstva za održavanje opreme i vatrogasnih sredstava od 3.000,00 do 5.000,00 KM ..... 3 boda,
  - planirana sredstva za održavanje opreme i vatrogasnih sredstava od 5.000,00 do 10.000,00 KM ..... 4 boda,
  - planirana sredstva za održavanje opreme i vatrogasnih sredstava preko 10.000,00 KM ..... 5 bodova.
- b) Utrošena sredstva u budžetu grada/općine za održavanje opreme i vatrogasnih sredstava u prethodnoj godini (bez sredstva za zaštitu od požara i vatrogastvo iz člana 137. Zakona)
- veća od 10.000,00 KM ..... 10 bodova
  - od 5.000,00 KM do 10.0000,00 KM ..... 7 bodova
  - do 5.0000,00 KM ..... 4 boda
  - nisu utrošena sredstva u budžetu grada/općine ..... 0 bodova

### Član 13.

(Kriteriji za sufinanciranje investicione izgradnje i opremanja objekata za potrebe vatrogasnih jedinica)

- (1) Prilikom raspodjele sredstava za sufinanciranje investicione izgradnje i opremanja objekata za potrebe vatrogasnih jedinica koristiće se sljedeći kriteriji:
- a) Vrijednost investicione izgradnje i opremanja objekata za potrebe vatrogasnih jedinica
- investiciona izgradnja i opremanje objekata za potrebe vatrogasnih jedinica grada/općine vrijednosti do 20.000,00 KM ..... 1 bod,
  - investiciona izgradnja i opremanje objekata za potrebe vatrogasnih jedinica grada/općine vrijednosti od 20.000,00 do 30.000,00 KM ..... 2 boda,
  - investiciona izgradnja i opremanje objekata za potrebe vatrogasnih jedinica grada/općine vrijednosti od 30.000,00 do 50.000,00 KM ..... 3 boda,
  - investiciona izgradnja i opremanje objekata za potrebe vatrogasnih jedinica grada/općine vrijednosti od 50.000,00 do 100.000,00 KM ..... 4 boda,
  - investiciona izgradnja i opremanje objekata za potrebe vatrogasnih jedinica grada/općine vrijednosti preko 100.000,00 KM ..... 5 bodova.
- b) Utrošena sredstva u budžetu grada/općine za investicionu izgradnju i opremanje objekata za potrebe vatrogasnih jedinica u prethodnoj godini (bez sredstva za zaštitu od požara i vatrogastvo iz člana 137. Zakona)
- veća od 100.000,00 KM ..... 10 bodova
  - od 50.000,00 KM do 100.0000,00 KM ..... 7 bodova
  - do 50.0000,00 KM ..... 4 boda
  - nisu utrošena sredstva u budžetu grada/općine ..... 0 bodova
- c) Visina sufinansiranja grada/općine za investicionu izgradnju i opremanje objekata za potrebe vatrogasnih jedinica
- od 51 % do 60 % ..... 3 boda
  - od 61 % do 80 % ..... 5 bodova
  - preko 80 % ..... 7 bodova

### Član 14.

(Ograničenja za dodjelu sredstava)

- (1) Sredstva se ne mogu dodjeljivati gradovima i općinama:
- a) koji nisu u propisanom roku opravdali namjenski utrošak sredstava dodijeljenih u prethodnim godinama iz sredstava za zaštitu od požara i vatrogastvo koja pripadaju Kantonu,
- b) kojima su sredstva za isti projekat dodijeljena po prethodnom javnom pozivu objavljenom od strane Kantonalne uprave.

## IV – POSTUPAK ZA DODJELU SREDSTAVA GRADOVIMA I OPĆINAMA

### Član 15. (Javni poziv)

- (1) Dodjela sredstava za namjene iz člana 3. tačka a), b) i c) ove Odluke vrši se putem javnog poziva koji objavljuje Kantonalna uprava na svojoj internet stranici.
- (2) Na javni poziv iz stava (1) ovog člana mogu se prijaviti gradovi i općine sa područja Kantona koji ispunjavaju uslove iz člana 10. ove Odluke.
- (3) Prijavu na javni poziv, u skladu sa ovom Odlukom, podnosi gradonačelnik/općinski načelnik, u roku od 15 dana od objave na web stranici Kantonalne uprave.
- (4) Prijava se podnosi na obrascu ZOP koji čini sastavni dio ove Odluke.
- (5) Prijava na javni poziv mora sadržavati podatke u koju svrhu i u kojem iznosu se pomoć traži, detaljno obrazloženje planiranih projekata ili aktivnosti i uz istu se prilažu propisani dokazi i dokumentacija.
- (6) Grad/općina su dužni u aplicirati za projekte i aktivnosti koji su planirani, pripremljeni i objektivno izvodivi u utvrđenim rokovima iz ove odluke.

### Član 16. (Postupanje po prijavama)

- (1) Prijave i dostavljenu dokumentaciju razmatra Komisija koju rješenjem imenuje direktor Kantonalne uprave (u daljem tekstu: Komisija).
- (2) Komisija prvo utvrđuje formalnu ispravnost prijave odnosno da li su iste blagovremene i potpune. Za neblagovremene i nepotpune prijave Komisija sačinjava zasebnu listu u kojoj se navode razlozi formalne neispravnosti.
- (3) Nepotpune i neblagovremene prijave se ne uzimaju u razmatranje.
- (4) Komisija vrši postupak bodovanja urednih prijava na sljedeći način:
  - utvrđuje se ukupan broj bodova svih prijavljenih gradova/općina koji ispunjavaju uslove za dodjelu sredstava,
  - ukupan iznos sredstava za raspodjelu po javnom pozivu se dijeli sa ukupnim brojem bodova iz alineje (1) (dobije se vrijednost jednog boda),
  - broj bodova pojedinog grada/općine se množi sa utvrđenom vrijednošću jednog boda.
- (5) Nakon završenog postupka bodovanja Komisija će sačiniti rang listu gradova/općina sa odobrenim projektima/aktivnostima i predloženim pojedinačnim iznosima za svaki grad/općinu.

### Član 17. (Odluke o dodjeli sredstava)

- (1) Odluke o dodjeli finansijskih sredstava gradovima i općinama donosi direktor Kantonalne uprave na prijedlog Komisije.

### Član 18. (Ugovori)

- (1) Kantonalna uprava će nakon donošenja odluka iz člana 17. sa gradovima i općinama kojima se dodjeljuje pomoć zaključiti ugovore u kojima će biti utvrđena sva međusobna prava i obaveze.
- (2) Kantonalna uprava vodi evidenciju o dodijeljenoj pomoći u skladu sa ovom Odlukom.

## V ROKOVI ZA KORIŠTENJE POMOĆI I KONTROLA UTROŠKA DODIJELJENIH SREDSTAVA

### Član 19.

(Izvještavanje i rokovi za utrošak sredstava)

- (1) Dodijeljena sredstva se mogu koristiti isključivo za odobrenu namjenu.
- (2) Gradovi odnosno općine, kojima su dodijeljena sredstva u skladu sa ovom Odlukom, obavezni su podnijeti detaljan izvještaj i opravdati potrošnju tih sredstava najkasnije u roku od 12 mjeseci od dana uplate sredstava na račun grada/općine. Izvještaj mora biti potpisan i ovjeren od strane rukovodioca službe civilne zaštite i gradonačelnika/općinskog načelnika. Uz izvještaj se dostavljaju i dokumentacija kojom se dokazuje namjenski utrošak sredstava (ugovori, fakture, računi, zapisnici, izvršeni nalozi za plaćanje i sl.)

### Član 20.

(Povrat sredstava)

- (1) U slučaju nenamjenskog utroška dodijeljenih sredstava ili u slučaju da grad/općina ne opravda potrošnju dodijeljene pomoći u propisanom roku, Kantonalna uprava će jednostrano raskinuti Ugovor i zatražiti povrat dodijeljenih sredstava odnosno dijela sredstava koja nisu namjenski utrošena.

## VI- KORIŠTENJE SREDSTAVA ZA ZAŠTITU OD POŽARA I VATROGASTVO ZA STRUČNO OBUČAVANJE I OSPOSOBLJAVANJE VATROGASACA

### Član 21.

(Troškovi stručnog obučavanja i osposobljavanje vatrogasaca)

Sredstva za zaštitu od požara i vatrogastvo koriste se za plaćanje troškova stručnog obučavanja i osposobljavanja pripadnika dobrovoljnih vatrogasnih jedinica dobrovoljnih vatrogasnih društava koje djeluju na području Kantona, odnosno grada općine na području Kantona.

### Član 22.

(Provođenje obuke i osposobljavanja)

- (1) Obuka i osposobljavanje vrše se u profesionalnoj vatrogasnoj jedinici Kantona odnosno Kantonalne uprave, prema planu obuke za dobrovoljnog vatrogasca, koji je dužan sačiniti starješina profesionalne vatrogasne jedinice.
- (2) Ako Kantonalna uprava nema svoju profesionalnu vatrogasnu jedinicu ili zbog ekonomičnosti, obuka i osposobljavanje se mogu organizovati i provesti u jednoj od dobrovoljnih vatrogasnih jedinica dobrovoljnih vatrogasnih društava ili vatrogasnih jedinica pravnih lica sa područja Kantona, koje ispunjavaju uslove (kadrovske i materijalne) potrebne za organizovanje i provođenje ove obuke.
- (3) Izuzetno, obuka i osposobljavanje mogu se organizovati i provesti u jednoj od profesionalnih vatrogasnih jedinica općine/grada sa područja Kantona.
- (4) Radi provođenja obuke i osposobljavanja, Kantonalna uprava zaključuje odgovarajući sporazum sa odgovornim licem u dobrovoljnom vatrogasnom društvu ili pravnom licu ili nadležnim organom općine/grada, gdje je formirana vatrogasna jedinica (u daljem tekstu: Nosilac izvođenja obuke) kojim će biti regulisana sva međusobna prava i obaveze.

Član 23.  
(Visina troškova stručnog obučavanja i osposobljavanja)

Visina troškova stručnog obučavanja i osposobljavanja utvrđuje se u sporazumu iz člana 22. stav (4) ove Odluke.

Član 24.  
(Plan obuke i osposobljavanja)

- (1) Nosilac izvođenja obuke dužan je izraditi Plan obuke i osposobljavanja isti dostaviti Kantonalnoj upravi u roku od sedam dana prije početka njegove realizacije radi verifikacije i ovjere (u daljem tekstu: Plan obuke)
- (2) Uprava će od Nosioca izvođenja obuke, ukoliko bude potrebno, tražiti izmjene sadržaja nastavnih tema i broja sati u Planu obuke, radi osiguranja jednakih uslova za sve kandidate polaznike obuke i osposobljavanja za polaganje ispita.

Član 25.  
(Određivanje lica za izvođenje obuke)

Nosilac izvođenja obuke rješenjem određuje stručna lica iz profesionalne odnosno dobrovoljne vatrogasne jedinice, koja će realizovati Plan obuke i osposobljavanja.

Član 26.  
(Vođenje dnevnika rada)

- (1) Nosilac izvođenja obuke obavezan je voditi dnevnik rada polaznika obuke i osposobljavanja.
- (2) U dnevnik rada iz stava (1) ovog člana upisuju se podaci o realizovanim nastavnim temama i jedinicama, broju nastavnih sati, prisutnim i odsutnim polaznicima obuke i osposobljavanja.
- (3) Nosilac izvođenja obuke je dužan, najkasnije u roku od sedam dana prije početka realizacije obuke i osposobljavanja, dostaviti Kantonalnoj upravi dnevnik rada sa imenima polaznika obuke i osposobljavanja, radi ovjere.

Član 27.  
(Izveštaj o provedenoj obuci i osposobljavanju)

- (1) Nosilac izvođenja obuke je dužan dostaviti Kantonalnoj upravi izvještaj o provedenoj obuci i osposobljavanju, u kojem će obavezno biti navedeni podaci o kandidatima koji su prošli obuku i osposobljavanje te podaci o dobrovoljnim vatrogasnim društvima čiji su kandidati prošli obuku.
- (2) Izvještaj iz stava (1) se dostavlja najkasnije u roku od 30 dana od završene obuke i osposobljavanja.



## VII- PRELAZNE I ZAVRŠNE ODREDBE

### Član 28. (Prestanak važenja propisa)

Danom stupanja na snagu ove odluke prestaje da važi Odluka o korištenju finansijskih sredstava namijenjenih za zaštitu od požara i vatrogastvo („Službene novine Tuzlanskog kantona“, broj 1/15).

### Član 29. (Stupanje na snagu)

Ova odluka stupa na snagu danom donošenja i objaviće se u „Službenim novinama Tuzlanskog kantona“.

B o s n a i H e r c e g o v i n a  
Federacija Bosne i Hercegovine  
TUZLANSKI KANTON  
VLADA

PREMIJER KANTONA

Irfan Halilagić

## **Obrazloženje**

### **Zakonski okvir za donošenje propisa**

Pravni osnov za donošenje Odluke o korištenju finansijskih sredstava ostvarenih po osnovu naknade iz premije osiguranja imovine od požara i prirodnih sila i sredstava od naplaćene funkcionalne premije osiguranja koja se odnosi na osiguranje motornih vozila sadržan je u članu 137. stav 6. tačka 2) Zakona o zaštiti od požara i vatrogastvu („Službene novine Federacije Bosne i Hercegovine“, broj 64/09 – u daljem tekstu: Zakon).

U skladu sa članom 137. Zakona društva za osiguranje i druga pravna lica koja se bave osiguranjem imovine pravnih i fizičkih lica, dužna su izdvajati finansijska sredstva iz premije osiguranja imovine od požara i prirodnih sila u iznosu od 6%, a 1% sredstava od naplaćene funkcionalne premije osiguranja, koja se odnosi na osiguranje motornih vozila. Ova sredstva uplaćuju se na poseban račun budžeta (trezora) Federacije, kantona ili općine, a vode se na posebnom jedinstvenom transakcijskom računu. Raspodjeljuju se tako što 10% pripada Federaciji, 20% kantonu i 70% općini i gradu i koriste se za namjene propisane ovim Zakonom (nabavku vatrogasne opreme, tehničkih i drugih sredstava zavatrogasne jedinice, stručno obučavanje i osposobljavanje vatrogasaca i održavanje opreme i vatrogasnih sredstava, te investicionu izgradnju i opremanje objekata za potrebe vatrogasnih jedinica).

### **Razlozi za donošenje propisa**

Važećom Odlukom o korištenju finansijskih sredstava namijenjenih za zaštitu od požara i vatrogastvo („Službene novine Tuzlanskog kantona“, broj 1/15) nisu dovoljno precizno i na detaljan način utvrđeni postupak i ograničenja za korištenje ovih sredstava niti su utvrđeni uslovi korištenja istih za stručno obučavanje i usavršavanje vatrogasaca.

### **Provedbeni mehanizmi i način osiguravanja primjene propisa**

Postupak dodjele sredstava provodiće Kantonalna uprava na transparentan način putem javnog poziva.

Sredstva za zaštitu od požara i vatrogastvo koja se planiraju trošiti u tekućoj godini moraju biti sastavni dio planske projekcije budžeta Tuzlanskog kantona. Na osnovu planske projekcije budžeta, godišnji plan donosi Kantonalna uprava, na koji Vlada Tuzlanskog kantona daje suglasnost.

Općine i gradovi kojima se dodjeljuju sredstva dužne su u propisanim rokovima dostaviti izvještaje o namjenskom utrošku ovih sredstava, a u slučaju nenamjenskog utroška isti su dužni izvršiti povrat dodijeljenih sredstava.

Izvještaj o korištenju sredstava za zaštitu od požara i vatrogastvo za prethodnu godinu Kantonalna uprava podnosi Vladi Tuzlanskog kantona na razmatranje i usvajanje.

### **Procjena ekonomske opravdanosti donošenja propisa**

Udruživanjem sredstava Kantona i lokalnih zajednica omogućava se realizacija projekata od značaja za Kanton i lokalne zajednice, a u cilju jačanja sistema zaštite od i vatrogastva. Zakonom i podzakonskim aktima su propisane namjene za koje se ova sredstva mogu trošiti, te Kantonalna uprava raspodjelom istih izvršava zadatke iz djelokruga svoje nadležnosti.

Takođe, na ovaj način se podstiču i lokalne zajednice da vlastite prihode po ovom osnovu troše za jačanje sistema zaštite od požara i vatrogastva.

## **Procjena finansijskih sredstava i koristi**

Na osnovu projektovanih prihoda po osnovu sredstava za zaštitu od požara i vatrogastvo i neutrošenih sredstava prikupljenih po ovom osnovu iz prethodnih godina, Kantonalna uprava u Planu korištenja sredstava za tekuću godinu utvrđuje iznose sredstava za svaku od zakonom propisanih namjena, a u skladu uslovima propisanim u članu 137. Zakona.

Donošenje i provođenje ovog propisa ne zahtjeva dodatna finansijska sredstva u Budžetu Kantona.

## **Revizije postojećih propisa**

Kantonalna uprava će pratiti provođenje ovog propisa i po potrebi vršiti preispitivanje potrebe za izmjenama i dopunama istog.

Obradivač

Kantonalna uprava civilne zaštite